



Dani hadža i nadahnuća (Meka)

Hatib: dr. Mahir ibn Hamed el-Muajkili

3. zulhidže 1446. po Hidžri / 30. maj 2025.

Hvala Allahu, Koji je časnu Kuću učinio utočištem i sigurnim mjestom ljudima. Svjedočim da nema drugog boga osim Allaha, Jedinog, Koji nema sudruga, On ima najljepša imena i najuzvišenija svojstva.

Svjedočim da je naš poslanik i vjerovjesnik Muhammed, sallallahu alejhi ve sellem, Njegov rob i poslanik, kojeg je Allah poslao kao donositelja radosnih vjesti i opomene prije Sudnjeg dana. Neka su Allahovi blagoslovi, mir i milost na njega, na njegovu porodicu, ashabe, supruge i sve one koji ga slijede u dobročinstvu do Sudnjega dana.

O vjernici, bojte se Allaha onako kako vam je naredio, pa će vam ispuniti ono što vam je obećao:

“A onome ko se Allaha boji, On će izlaz naći i opskrbit će ga odakle se i ne nada.”
(Et-Talak, 2–3)

“A onome ko se Allaha boji, On će sve što mu treba učiniti dostupnim.” (Et-Talak, 4)

Hodočasnici časne Allahove kuće, vi koji ste odgovorili na poziv Gospodara i odlučili obaviti svoju obavezu, čestitam vam na tome što ste dosegli ovaj časni položaj. Ovo su Mekam, Zemzem, Crni kamen i mjesto obavljanja tavafa. Ovdje se suze liju, stepeni uzdižu, grijesi brišu i oprost stječe. Neka Allah upotpuni vaš ibadet i primi vašu pokornost Njemu.

Ummete islama! Uzvišeni Allah obavezao se da će sačuvati Svoj din, vjeru, i propisao je šerijatske uzroke za njegovo očuvanje, a jedan od tih uzroka jeste očuvanje njegovih simbola i obreda, propisa. Vjera ostaje među ljudima dokle god oni





izvršavaju i čuvaju njene obrede. Poštovanje Allahovih obreda i propisa znak je bogobojažnosti srca: "Eto toliko! Pa ko poštiva Allahove propise – znak je čestita srca" (El-Hadždž, 32).

Svaki dan, svako jutro i svaku večer svjedočimo Allahovim obredima i svetinjama.

Dva šehadeta su uvjet ispravnosti islama i njegov simbol. Ezan je obilježje namaza. Zekat i post su islamski obredi.

Hadž i umra, također, spadaju u javne obrede, obilježja, simbole, islama.

Prostorna obilježja (obredi, simboli) su: Mina, Arefat, Muzdelifa, Safa i Merva, Mekamu Ibrahim i Multezem, Allahova časna Kuća u kojoj jedan namaz vrijedi kao stotinu hiljada namaza izvan nje.

Slavljeni Gospodar iz Svoje veličine, uzvišenosti, čistog odabira i ljubavi prema njoj, pripisao ju je Sebi u Svojoj objavi: "... i očisti ovaj Hram Moj za one koji će ga obilaziti, koji će tu u blizini njegovoj stanovati, i koji će molitvu obavljati" (El-Hadždž, 26).

To je Allahova časna Kuća kojoj srca hrle s čežnjom, a duše joj dolaze s ljubavlju. Njenim poštivanjem poštuje se islam, zbog čega su naši dobri prethodnici pridavali Kabi najveće poštovanje i iskazivali joj najdublju počast.

Kao što se u blizini Kabe nagrada uvećava, tako se i grijeh uvećava, jer s dobitkom je odgovornost. Cijeli prostor Meke je svet, a njena svetost odavno je uspostavljena. U vjerodostojnim hadisima stoji da je Poslanik, sallallahu alejhi ve sellem, rekao: "Allah je učinio Meku svetom od dana kada je stvorio nebesa i Zemlju, i ona će ostati sveta Allahovom odredbom do Sudnjeg dana. Nije dozvoljeno tjerati (radi lova) njenu divljač, sjeći njeno drveće, niti uzeti izgublenu stvar u njoj, osim onome ko će se raspitivati o njenom vlasniku."

Uzvišeni kaže: "Prvi hram sagrađen za ljude jeste onaj u Meki, blagoslovljen je on i putokaz svjetovima. U njemu su znamenja očevitna – mjesto na kojem je stajao Ibrahim. I onaj ko uđe u nj treba biti siguran." (Ali Imran, 96–97)





O vjernici, jedan od Allahovih obreda (obilježja, simbola) jeste dan Arefata, a to je dan ispunjenja zavjeta, koji je Uzvišeni Allah uzeo od Ademovog potomstva. Poslanik, sallallahu alejhi ve sellem, rekao je: "Allah je uzeo zavjet od Ademovog potomstva u mjestu Nu'manu – tj. Arefatu – i izveo iz njegovih leđa svu njegovu buduću djecu, pa ih rasuo pred Sebe poput zrna prašine, zatim ih direktno upitao: 'Zar nisam vaš Gospodar?' Oni su rekli: 'Da, svjedočimo', kako ne biste na Sudnjem danu rekli: 'Mi o ovome ništa nismo znali.'" (Ahmed)

Na dan Arefata, naš Gospodar spušta se na najniže nebo, na način koji priliči Njegovoj uzvišenosti, veličini i slavi, i hvali one koji stoje na Arefatu, pred Svojim melekima. To je dan u kojem Allah oslobađa najviše ljudi od Vatre, ne samo one koji stoje na Arefatu, već i one iz svih krajeva svijeta.

Ako je onima koji borave na Arefatu ukazana počast da izvrše rukn, ili najvažniji obred hadža, onda je onima koji nisu na Arefatu također ukazana počast, ali u drugom obliku, tj. njima je propisan post tog dana, jer se njime brišu grijesi počinjeni u dvije godine. Poslanik, sallallahu alejhi ve sellem, rekao je: "Post dana Arefata, nadam se od Allaha, briše grijeha koji su počinjeni u prošloj godini i koji će biti počinjeni u narednoj godini." (Muslim)

Poštovani vjernici, poštivanje odabranih vremena smatra se poštivanjem Allahovih obreda (simbola, obilježja). Trenutno se nalazimo u najodabranijim danima godine, kojima se Allah zakleo i koje je učinio najboljim, rekavši: "Tako Mi zore i deset noći" (El-Fedžr, 1–2).

U ovih deset dana mjeseca zulhidžeta spojili su se raznovrsni ibadeti, kao ni u jednom drugom dijelu godine.

Poslanik, sallallahu alejhi ve sellem, rekao je: "Nema vrednijeg djela od onog učinjenog u ovim danima." Prisutni upitaše: "Pa čak ni džihad na Allahovom putu?" "Pa čak ni džihad na Allahovom putu, osim čovjeka koji izađe u borbu na Allahovom putu i na njemu založi i svoj život i imetak." (Buhari)





Ovim riječima Poslanik, sallallahu alejhi ve sellem, podstakao je na svako dobro djelo, namaz, post, održavanje rodbinskih veza, sadaku, učenje Kur'ana, dobročinstvo prema roditeljima, otklanjanje poteškoća, pružanje pomoći potrebnima, i ostale vrste pokornosti.

A jedno od najboljih djela u ovim danima jeste hadž. U vjerodostojnom hadisu stoji: "Umra do umre briše grijeha između njih, a za hadž mebrur nema druge nagrade osim Dženneta."

Međutim, hadž nije primljen i mebrur osim ako je učinjen isključivo radi Allaha i u skladu s praksom Njegovog Poslanika, sallallahu alejhi ve sellem.

Slijedite svoga Poslanika, postupajte prema Allahovim naredbama i tražite Njegovu milost – tako ćete postići Njegovo zadovoljstvo i Džennet.

"I kada smo kao pribježište Ibrahimu pokazali mjesto gdje je Hram, rekli smo: 'Ne smatraj Nama nikoga ravnim, i očisti ovaj Hram Moj za one koji će ga obilaziti, koji će tu u blizini njegojvoj stanovati, i koji će molitvu obavljati i ogłosi ljudima hadž!' – dolazit će ti pješke i na devama iznurenim; dolazit će iz mjesta dalekih, da bi koristi imali i da bi u određene dane, prilikom klanja kurbana, kojim ih je Allah opskrbio, Njegovo ime spominjali. Jedite meso njihovo, a nahranite i siromaha ubogog! Zatim, neka sa sebe prljavštinu uklone, neka svoje zavjete ispune i neka oko Hrama drevnoga obilaze." (El-Hadždž, 26–29)

O vjernici! Uzvišeni Allah stvorio je svijet u savršenom poretku i učinio je da funkcioniše precizno. Baš kao što je Allah uspostavio skladan sistem u svemiru, tako je dao muslimanu jasne smjernice koje treba slijediti u svojim ibadetima, poslovnim transakcijama, ponašanju i karakteru. Islam je uređena vjera, koja podstiče na red i disciplinu, čime se osiguravaju koristi i sprečavaju štete.

Allah ima prava kod Svojih robova, koja se moraju izvršiti na vrijeme, noćne obaveze ne mogu se odložiti za dan, niti se dnevne obaveze mogu odložiti za noć. Šerijat je propisao ibadete, regulisao odnose među ljudima, definisao način iskupljenja za određene prekršaje i imovinske obaveze.





Hadž ima svoje određene mjesece, svoje dane, svoje različite obrede i precizno definirana vremenska i prostorna ograničenja. Hadž je ibadet koji kod ljudi razvija disciplinu, što se jasno očituje kroz njegove obrede, ruknove, obavezne činove i uvjete.

Braćo u vjeri! Ako je šerijat usmjerio pažnju na organizaciju života muslimana i njegovih ibadeta, još veći naglasak stavlja na sigurnost i olakšavanje u teškim situacijama i zaštitu od štete.

A to je upravo ono što čini Kraljevina Saudijska Arabija, koja je podredila sve svoje resurse i mogućnosti i obezbijedila sve potrebne uvjete za olakšanje izvršenja hadža i sigurnost hodočasnika. Uspostavila je precizne sisteme zaštite i sigurnosti, u skladu sa šerijatskim principima očuvanja života i imovine.

Hadž bez dozvole nije samo kršenje propisa, već i nanošenje štete muslimanima, povreda prava drugih, kao i narušavanje pažljivo postavljenih organizacionih pravila. Zato je neophodno da svaki hodočasnik poštuje ovaj uzvišeni obred, osjeti svetost mjesta kroz iskreno obožavanje Allaha, pokaže strpljenje, blagost i smirenost, pridržava se pravila, izbjegava prepirke i grijeh, i shvati da su svi propisi uspostavljeni radi javne sigurnosti i koristi cijele zajednice.

Neka Allah zaštiti hadžije, neka im primi njihov hadž i ostale ibadete, i neka ih vrati njihovim porodicama zdrave i sigurne, s potpunom nagradom.

O vjernici, Allah vam je naredio uzvišenu stvar, rekavši: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šalžite mu pozdrav!" (El-Ahzab, 56)

